

Beretitenti Henry B. Eyring

Moan Kauntira n te Moan Beretitentii



# Te Rau n Te Maiu Aei

Nakoira ni kabane aika kam roko n te maiu ae mamate, e taku te Tia Kamaiu, "Ami b'ai i aon te aba te rawawata" (Ioane 16:33). E ngae n anne ao E anga ana berita ae moan te tamaraa nakoia Ana reirei n Ana tai ni mwakuri n te maiu ae mamate: "I katuka te rau i roumi, I anganiningkami au rau: I aki anganiningkami n ai aron te aba, ngkana e anga" (Ioane 14:27). E karau nano ataakin ae na reitinako te berita ae tabu aei e na reitinako ibukiia Ana reirei ni kabane n te bong aei.

Tabeman mai ibuakora a maeka n otabwanin aika tiki-raoi man n rau, ma ti bon teimatoa naba ni karekei namakin ni kairiribai ao n ni kaangaanga. Tabeman a namakina te rau ao te aki karongoa ae kororaoi n tain te nanokawaki, kakamaaku, ao te kataaki ae teimatoa.

Ko na bae n tia n noora te kakai n rau ae kona n ataaki iaon moamoan ana reirei Jesu Kristo ke n ongo n oin ana taeka teuanne ke neienne. I a tia n noria n taai aika mwaiti. N tabetai e a tia ni mena inanon ruun te o n aoraki ike a ikotaki iai te utu ni katobibiia ana toro te Atua ae e a kaniia matena.

I uringa kawarakin te aine n te o n aoraki tabeua te bong imwain matena man te kaentia. I kairiia natiu aika aataeinaine n raonai bukina bwa te titita ae moan te tamaraa aei e a tia n riki ngkoa bwa aia tia reirei n te Moanrinan.

A bane kaain ana utu ni katobibiia ana kainiwene, n tangiria ni kaan ma ngaia n ana kabanea n tai imwain matena. I rangin ni miimi ngke e a tekateka iaon te kainiwene. E nakoia natiu aine ao ni kabwarabwaraia ni

kauoman, temanna imwiin temanna, nakoia kaain ana utu. E taetae n ae kanga a uotaki natiu aine n rine n ana bowi te uea n aine. E atatai iaoia aomata n tatabemaniaa nako inanon te ruu n riki bwa ana reirei te Tia Kamaiu. I teimatoa n uringa te korakora, te nano, ao te tangira ni bwanaana. Ao I uringnga ngarena n rangi ni kukurei e ngae ngke e ataia ae e na waekoa ni mate.

E a tia ni karekei kakabwaia ni karaunano n te nakoanibonga, ma e tibwaua ana koaua ma ngaira ni kabane n aron ae a tia ni maiuakinna ae Ana berita te Uea n rau e boni koaua: "I atongi baikai nakoi imi, ba kam na karekeia te rau mai Rou. Ami b'ai i aon te aba te rawawata: ma kam na kabebetei nanomi; I a tia ni katea ana kai te aba" (Ioane 16:33).

E a tia ni kariaia Ana kakao, n arora ae ti bane ni konaa, n aki tabe ma kataakira ao ara kaangaanga:

"Bane mai nako Iu, ngkami akana kam kua ao kam rawawata, ao N na motiki rawami.

"Amoa amou i aomi, ao reirei i Rou; bwa I nimamanei ao I nanorinano: ao e na reke i roumi iai motikan rawaia tamneimi" (Mataio 11:28–29).

Ti man irakin te Tia Kamaiu ae ti kona iai ni karekeia te rau ao te kabebeteaki n taian ni kataaki aika ti na bane ni kaaitarai.

Tataro n te toa a buokiira n ataia bwa ti na kanga ni karekeia te rau anne inanon kaangaangan te maiu. Ngke ti taua te toa, ti kona ni kekeiaki ni kakaonimaki nakon ara berita aika tabu n Ririmwiina.

Ngaira n tatabemaniira nako ti berita bwa ti na ururinga te Tia Kamaiu. Ko kona n rinea bwa ko na Uringnga n te kawai are e na anaa nanom nako Ina. N tabetai ibukiu, bon Iangoakina ni katorobubua n te Onaroka are i Ketetemanane ke n nooria ni wetea Rataro bwa e na otinako man te rua ni mate. Ngke I iangoa te bwai aei, I namakina te kaan riki nako Ina ao te kakaitau are e uota te rau nako nanou.

Ko berita naba bwa ko na kawakin Ana tua. Ko berita bwa ko na uouota Arana iaom ao n riki bwa Ana tia kakaua. E berita bwa ngkana ko kawakin am berita ma Ngaia aika tabu, te Tamnei ae Raoiroi e na raoraoniko. (Taraa D&C 20:77, 79.)

Aio e uota te rau inanon ae tao uoua te bong. E kai-tiakiira Te Tamnei ae Raoiroi man ara bure ibukin ana Mwakuri ni Kamaiu Iesu Kristo. Ao te Tamnei ae Raoiroi e kona n anganiira te rau are e roko man ana kariaia te Atua ao te kantanninga n te maiu are akea tokina.

E taetae te Abotoro Bauro iaon te kakabwaia ae kamimi aei: “Ao uaan te Tamnei te tangira, te kimwareirei, te rau, te taotaonaki n nano, te atataiaomata, te raoiroi, te kakao-nimaki” (I-Karatia 5:22).

Ngkana ana taan uarongorongo karawa a tuatua bungian te Tia Kamaiu, a katanoata, “E na neboaki te Atua ike moan te rietata, ao e na *raoi aonaba*” (Ruka 2:14; e kairaki ma katuruturuana). I kaota au koaua ngkai ana tia kakoaua Iesu Kristo ae a kona te Tama ao Natina ae Tangiraki ni kanakoa te Tamnei ni kariaia bwa ti na karekea te rau n te maiu aei, ni kataaki ake a kona n roko iroura ao nakoia ake ti tangiriia.

## REIREI MAN TE RONGORONGO AEI

E reireiniira Beretitenti Eyring ae e kona te tataro n toa ni buokiira n ataia bwa ti na kanga ni karekea te rau n tain kataakira. A kauringiira bwa ngkana ti kawakin ara berita aika tabu, ti na karekea ana berita te Atua ae tabu bwa e na memena te Tamnei ae Raoiroi iroura. Iangoia n titirakinia naake ko reireiniia bwa e kanga karekean te Tamnei ae Raoiroi ni kona ni buokiira ni karekea te rau. Ko kona naba

n tibwauai am iango ke te atatai bwa e na kanga te Tamnei ae Raoiroi ni buokiko n namakina te rau n te kataaki. Ko na bae ni kaungaia naake ko reireiniia bwa ana iangoa raoi te rongorongo aei n tain te toa n te wiiki aei.

## KAIRAKE

### Ko na Kanga n Uringa te Tia Kamaiu n te Wiiki Aei?

E kauringiira Beretitenti Eyring bwa ti na “rineia n uringa [te Tia Kamaiu] n te kawai are e na anaa nanom nako Ina.”

Ko kanga n “Ururingnga n taainako” ni kabutaa te wiiki (taraa D&C 20:77, 79)?

Iai am kibu ae mamate nanom iai iaon te Tia Kamaiu? Ko kona ni mwaakena te kibu ae kaokoro ni katoa bong n te wiiki aei ao n tibwauia ma temanna.

Ke anenea te kuna ke te anene teuana riki ae kairaki iroun te tamnei ngkana ko namakina te aki kukurei? Tao ko na rinea teuana are e kaineti ma te Tia Kamaiu n te wiiki aei.

Ko iangoa raoi maiun te Tia Kamaiu ao ana karea ni kamaiu n tain te toa ni katoa wiiki? Ko kona ni katauraoi ibukin te toa man uringakin am rinerine inanon te wiiki n uringa te Tia Kamaiu n taainako ao n raira nanom ngke ko rinanon te kaangaanga.

Ko tataro ibukin reken taai n tibwaua te euangkerio ni katoa bong? Kataia ni karekea te marooro iaon te euangkerio n te wiiki aei are e kaineti ma te Tia Kamaiu. Ko kona ni kaota am koaua iroun te Tia Kamaiu n tain te bootaki n utu n te tairiki ke taetae nakon raoraom n te reirei iaon te atatai ae ko a tia ni karekea n te taromauri.

Katea te kouru n uringa te Tia Kamaiu n te kawai ae onoti n te wiiki aei. Tuanga te karo, tarim ao mwaanem, te tia kairiiri, ke raoraom taekan am kouru. N tokin te wiiki, tuangiia te bwai ae a tia n riki. Kam na namakina te rau ao te kukurei n te bwai ae taekinna Beretitenti Eyring.

## Nakomai Nakon Kristo.

**E**a tia te Tia Kamaiu ni berita nakoira te rau ngkana ti "bane mai [Nako Ina]" (Mataio 11:28). E nanonaki aei bwa ko na ira Ana katooto ao ni kataia n tiku ni kaniiko ma Ngaia.

- Bwaina te rau n tain te toa.
- Rineia bwa ko na akoi ao n aki tiribureia tabeman.
- Wareka taekan te Tia Kamaiu inanon booki aika tabu.



# Kimwareirein te Utu e kuneaki n te Raoiroi

Tataromuaaka ni kamatebuia te buai n reirei aei ao n ukoria ibukin te kairi mai ieta bwa ko aonga n ataia bwa tera ae ko na tibwaia. E na kanga ataakin “Te Utu: Te Katanoata nakon te Aonaaba” ni karikirakea am onimaki iroun te Atua ao ni kakabwaiatia naake ko tararuaiia rinanon te kakawari n reirei? Ibukin rongorongona riki tabeua, nakon [reliefsociety.lds.org](http://reliefsociety.lds.org).

**T**e Atua “E katei utu bwa ti na karekei mai iai kukurei, bwa e na buokiira n reirei koaua aika eti n te aro n tangira, ao ni katauraoira ibukin te maiu are akea tokina.”<sup>1</sup> Man ana “babaire ni kukurei” te Atua (Aramwa 42:8), Beretitenti M. Nelson, te Beretitenti n Aia Kooram Abotoro n te Tengaun ma Uoman, e taku: “E katanoata Ana babaire bwa a riai mwaane ao aine ‘ni karekea te kimwareirei’ [2 Nibwaai 2:25]. E na roko te kimwareirei anne ngkana ti rinea ni maiuakina ana babaire te Atua ae akea tokina ma te rau.”<sup>2</sup>

Te mweenga ae boboto iroun Kristo e karekea te tai ae moan te kakawaki ibukin te tokanikai. Unimwaane Richard G. Scott (1928–2015) man te Kooram n Abotoro n te Tengaun ma Uoman e kabwabwara bwa te tabo are “e reiakinaki iai te euangkerio, are a kawakinaki iai berita aika tabu, ao n roko mai iai te tangira,” ike a kona iai utu ni maiuakina “te maiu ae karinerine” ao n riki bwa te utu ae matoa waa-kana n ana euangkerio Iesu Kristo.<sup>3</sup>

Beretitenti Henry B. Eyring, te Moan Kauntira n te Moan Beretitentii, e taku: “Ti kona n iangoia ae ti na karoa ae ti kona

ni karoia ni uota rikaaki mwaakan karawa nako nanon [ara] utu.” Ao ti na kona ni karikirakea te tangira, mwakuri n ibuobuoki, ongotaeka, ao te kukurei inanon mweengara mairouia “[ara ataei] n ongo ana taea-ka te Atua ao ni kataia n te onimaki. Ngkana a karoia, ao e na bitaki aroia n te aro are e uota te kukurei are a ukoukoria.”<sup>4</sup>

## Mweenga Aika Aanaki iroun Kristo

Iai katootongan mweenga aika aanaki iroun Kristo inanon booki aika tabu. Imwiin maten Riaai, taman Nibwaai, e uotiia ana utu ao tabeman aika a kakoauai ana taeka ni kauring ma ana kaotioti te Atua ao aika a ongeaba nakon ana taeka Nibwaai ni kitana abaia Remwanaite. N te tabo ae boou aei, ao Nibwaite a ongeaba nakon taian babaire ao taian moti, ao ana tua te Uea iaon bwaai ni kabane, ni kaineiti ma ana tua Mote (taraa 2 Nibwaai 5:6–10). E ngae n anne riki ibuakoia Nibwaite, tabeman n te tai ae wae-koia a moanna n aki ongotaeka.

Ao ngkai a kona kaain ara utu n tabetai ni katoka te maiu ae raoiroi n aron are a karoia Nibwaite,

e taekinna Unimwaane Scott bwa te mweenga ae e a aanaki iroun Iesu Kristo e teimatoa ni “karekea te koaua ae korakora ibukin te rau ao te katantan inanon mweengara.” E kakoaua ae “e na teimatoa mwaitin taian kakaewenako ke marakinnano, ma riki i nuukan taian kamangaongao, ti na kona n namakina te rau ma te kukurei inanora ae korakora.”<sup>5</sup>

## Rakan riki Booki aika Tabu

- 3 Ioane 1:4; 1 Nibwaai 8:12;
- 2 Nibwaai 5:27

### BWAAI AIKA A NA TARAAKI

1. *Aeniboki 2: Babairean aron kairan te Ekaretia* (2010), 1.1.4.
2. Russell M. Nelson, “Celestial Marriage,” *Riaona*, Nobembwa 2008, 92.
3. Richard G. Scott, “Ibukin te Rau n te Mweenga,” *Riaona*, Meei 2013, 30, 31.
4. Henry B. Eyring, “Te Reirei n Te Utu: Te Katanoata Nakon te Aonaaba,” *New Era*, Tebetembwa 2015, 5, 6.
5. Richard G. Scott, “Ibukin te Rau n te Mweenga,” 31.

## Iangoa Aio

Tera ae ti kona ni karoia ni maiuakina ae raoiroi riki inanon ara utu?